

Jadual Pembacaan Khutbah Jumaat

Siri 4/ 2023

(Bulan April Tahun 2023)

تاريخ	تاجوق	ب
7 April 2023M/ 16 Ramadan 1444H	Al Quran: Jati Diri Umat Islam	1.
14 April 2023M/ 23 Ramadan 1444H	Pecutan Di Akhir Ramadhan	2.
21 April 2023M/ 30 Ramadan 1444H	Ramadhan Akan Pergi	3.
28 April 2023M/ 7 Syawal 1444H	Kekal Beramal Ketika Syawal	4.
Khutbah Kedua Bulan April		

Dibiayai oleh:



Zakat Pulau Pinang

Diterbitkan oleh:



Jabatan Hal Ehwal Agama
Islam Pulau Pinang

Jawatankuasa Panel Semakan Teks Khutbah Negeri Pulau Pinang

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. Y.Bhg Dato' Rosli bin Othman**
Ahli Jawatankuasa Fatwa Negeri Pulau Pinang
- 3. Prof. Madya Dr. Atikullah bin Abdullah**
Pensyarah, Pusat Pengajian Ilmu Kemanusiaan,
Universiti Sains Malaysia
- 4. Ustaz Ahmad bin Hashim**
Ketua Pusat Pengajian Tahfiz Al-Quran,
Kolej Islam Teknologi Antarabangsa Pulau Pinang (KITAB)
- 5. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 6. Ustaz Mohd Salmi bin Shaimi**
Ahli Jawatankuasa Fatwa Negeri Pulau Pinang
- 7. Ustaz Subki bin Mohamed**
Mantan Pensyarah, IPG Kampus Tuanku Bainun
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)





Ramadhan Akan Pergi

(21 April 2023M/ 30 Ramadan 1444H)

الْحَمْدُ لِلَّهِ الَّذِي بِنِعْمَتِهِ تَتِمُّ الصَّالِحَاتُ، أَحْمَدُهُ سُبْحَانَهُ وَتَعَالَى أَنْ أَتَمَّ عَلَيْنَا صِيَامَنَا وَبَلَّغَنَا خِتَامَ شَهْرِنَا.

وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا عَبْدُ اللَّهِ وَرَسُولُهُ.
صَلَّى اللَّهُ وَسَلَّم عَلَى النَّبِيِّ الْكَرِيمِ مُحَمَّدٍ وَآلِهِ وَأَصْحَابِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.

أَمَّا بَعْدُ، فَاتَّقُوا اللَّهَ تَعَالَى وَأَطِيعُوهُ، وَأَحْسِنُوا خِتَامَ شَهْرِكُمْ بِخَيْرِ عَمَلِكُمْ،
وَالْزِمُوا أَنْفُسَكُمْ بِعَهْدِكُمْ، وَالِاسْتِمْرَارِ عَلَى طَاعَةِ رَبِّكُمْ.

MUSLIMIN RAHIMAKUMULLAH,

Sebelum meneruskan khutbah ini saya berpesan kepada saudara-saudara yang dikasihi agar dapat meningkatkan ketakwaan dengan mematuhi perintah Allah **سُبْحَانَهُ وَتَعَالَى** dan jauhilah segala larangan-Nya. Semoga segala amal ibadah yang kita lakukan dapat membawa kepada *al-falah* yakni kejayaan di dunia dan di akhirat.

Marilah kita tumpukan sepenuh perhatian kepada khutbah yang akan disampaikan. Jauhilah daripada perbuatan yang boleh mengurangkan ganjaran pahala Jumaat kita. Usah bercakap-cakap, simpanlah telefon bimbit untuk seketika serta tidak menggerakkan tabung kutipan Jumaat. Semoga khutbah yang disampaikan dapat diambil



panduan dan pesanannya. Khutbah kita pada minggu ini bertajuk: **“Ramadhan Akan Pergi.”**

SAUDARA-SAUDARAKU YANG DIKASIHI ALLAH,

Beberapa minggu yang lalu Ramadhan datang kepada kita. Kedatangan yang amat dinanti walau ada juga segelintir yang tidak mempeduli. Sedangkan ia datang dengan membawa rahmat dari Yang Maha Esa. Padanya segala syaitan dan konco-konconya dibelenggu, ditutup pintu-pintu neraka serta dibuka seluas-luasnya pintu-pintu syurga.

Daripada Abu Hurairah رَضِيَ اللَّهُ عَنْهُ, beliau berkata: Rasulullah صَلَّى اللَّهُ عَلَيْهِ وَسَلَّمَ bersabda yang bermaksud:

“Apabila tiba malam pertama bulan Ramadhan, syaitan-syaitan dan jin-jin yang jahat dibelenggu, pintu-pintu neraka ditutup, tidak ada satu pun pintunya yang terbuka. Pintu-pintu syurga dibuka, tidak ada satu pun pintunya yang tertutup. Lalu seorang penyeru menyeru: “Wahai yang mengharap kebaikan, bersegeralah (kepada ketaatan). Wahai yang mengharap keburukan, berhentilah (daripada melakukan keburukan). Allah سُبْحَانَهُ وَتَعَالَى akan membebaskan hamba-hamba-Nya daripada api neraka dan perkara tersebut berlaku pada setiap malam (di bulan Ramadhan).” ﴿Hadis Riwayat Ibnu Majah﴾

SIDANG JEMAAH YANG DIRAHMATI ALLAH,

Hari ini barangkali hari terakhir dalam bulan Ramadhan. Ia akan pergi, pergi yang mungkin tidak kembali. Ramadhan membawa pelbagai kenangan bersama mereka yang telah Allah kurniakan peluang hidup di



dalamnya. Bergembiralah bagi mereka yang memenuhinya dengan pelbagai ibadah. Dan celakalah mereka yang telah diberi peluang hidup dalam Ramadhan, tetapi tidak mendapat keampunan Allah. Allah telah menjanjikan pelbagai tawaran *maghfirah* dan rahmat di sepanjang Ramadhan. Namun masih ada sebahagian kita mensia-siakannya bahkan ada yang masih bergelumang dalam dosa dan maksiat. Sabda Rasulullah ﷺ:

وَرَغِمَ أَنْفُ رَجُلٍ دَخَلَ عَلَيْهِ رَمَضَانُ ثُمَّ انْسَلَخَ قَبْلَ أَنْ يُغْفَرَ لَهُ

Maksudnya: “...dan celakalah seseorang, apabila bulan Ramadhan menemuinya kemudian berlalu pergi sebelum dia mendapatkan keampunan (dosa-dosanya)..” ﴿Hadis Riwayat Imam At Tirmizi﴾

SIDANG JEMAAH YANG BERBAHAGIA,

Di hari yang terakhir ini, biarlah kita berpisah dengan Ramadhan melalui cara yang terbaik. Kita manfaatkan semaksimum mungkin setiap saat yang masih berbaki. Teruskanlah memperbanyakkan zikir, bacaan Al-Quran dan solat-solat sunat. Teruskan juga bersedekah bagi membantu mereka yang memerlukan. Jika kita telah istiqamah solat berjemaah di masjid, teruskan amalan mulia ini di bulan-bulan selepasnya. Barangkali ini semua menjadi asbab kita dibantu di sana nanti dengan rahmat-Nya.

Ayuh kita hiasi malam terakhir Ramadhan ini dengan memohon keampunan bersungguh-sungguh. Jangan kita dilalaikan dengan persiapan menyambut Aidilfitri semata-mata. Ingatlah peluang ini



mungkin tidak akan berulang. Jadikanlah diri kita seperti mereka yang digambarkan oleh Allah dalam surah as-Sajdah ayat 16:

تَتَجَاوَىٰ جُنُوبَهُمْ عَنِ الْمَضَاجِعِ يَدْعُونَ رَبَّهُمْ خَوْفًا وَطَمَعًا وَمِمَّا رَزَقْنَاهُمْ يُنفِقُونَ ﴿١٦﴾

Maksudnya: “Mereka merenggangkan diri dari tempat tidur (sedikit sangat tidur kerana mengerjakan solat tahajud dan amal-amal soleh); mereka sentiasa berdoa kepada Tuhan mereka dengan perasaan takut (akan kemurkaan-Nya) serta dengan perasaan ingin memperolehi lagi (keredhaan-Nya); dan mereka selalu pula mendermakan sebahagian dari apa yang Kami berikan kepada mereka.”

Demikianlah sikap mereka yang sentiasa mengharap keredhaan Allah dan keampunan-Nya, berusaha menjauhkan diri dari tempat tidur dan terus beramal ibadah.

SIDANG JEMAAH YANG DIRAHMATI ALLAH,

Pada detik ini juga, saya ingin mengajak saudara-saudara yang dikasihi untuk sama-sama kita bermuhasabah. Apakah ibadah puasa yang telah kita lakukan sepanjang bulan ini benar-benar diterima oleh Allah **سُبْحَانَهُ وَتَعَالَى** atau sebaliknya? Adakah kita termasuk dalam golongan yang mendapat rahmat dan pengampunan-Nya? Adakah kita termasuk dalam golongan yang selamat dari api neraka setelah menjalani sebulan puasa? Sejauh mana takwa yang telah kita tingkatkan setelah bergelar graduan dalam madrasah Ramadhan? Sedangkan Allah **سُبْحَانَهُ وَتَعَالَى** menjanjikan mereka yang berpuasa akan mencapai darjat *al-Muttaqin*. Firman Allah dalam surah Al Baqarah ayat 183:



يَا أَيُّهَا الَّذِينَ ءَامَنُوا كُتِبَ عَلَيْكُمُ الصِّيَامُ كَمَا كُتِبَ عَلَى الَّذِينَ مِن قَبْلِكُمْ
لَعَلَّكُمْ تَتَّقُونَ ﴿١٨٣﴾

Maksudnya: “Wahai orang-orang yang beriman, diwajibkan atas kamu berpuasa sebagaimana diwajibkan atas orang-orang sebelum kamu agar kamu bertakwa.”

Sekiranya masih timbul perasaan belum berpuas hati dengan diri sendiri pada Ramadhan kali ini, maka gunakanlah detik ini untuk memohon rahmat dan pengampunan dari-Nya.

Bermunajatlah kepada-Nya dengan bersungguh-sungguh. Janganlah kita tergolong dalam kalangan yang tidak mendapat rahmat daripada Allah **سُبْحَانَهُ وَتَعَالَى** seperti mana yang diceritakan dalam sebuah hadis daripada Abu Hurairah **رَضِيَ اللَّهُ عَنْهُ**, bahawa Nabi **صَلَّى اللَّهُ عَلَيْهِ وَسَلَّمَ** bersabda dengan maksud:

“Ketika Nabi **صَلَّى اللَّهُ عَلَيْهِ وَسَلَّمَ** menaiki mimbar, Baginda berkata: “Amin, amin, amin (sebanyak 3 kali). Baginda ditanya: “Wahai Rasulullah, apabila engkau menaiki mimbar, engkau telah berkata amin, amin, amin.” Maka Rasulullah **صَلَّى اللَّهُ عَلَيْهِ وَسَلَّمَ** bersabda: “Sesungguhnya Jibril **عَلَيْهِ السَّلَامُ** telah datang kepadaku, lalu dia (Jibril) berkata: (Salah satu antaranya adalah)

“Barangsiapa yang bertemu dengan bulan Ramadhan tetapi tidak diampunkan baginya maka dia akan dimasukkan ke dalam neraka serta dijauhkan (daripada rahmat) oleh Allah **سُبْحَانَهُ وَتَعَالَى**. Katakanlah (wahai Muhammad): Amin. Maka aku katakan: Amin.”

﴿Hadis Riwayat Ibnu Hibban﴾



SIDANG JEMAAH YANG DIRAHMATI ALLAH,

Esok Syawal menjelang dan kita akan menyambut hari raya Aidilfitri. Justeru suka khatib memberikan beberapa ingatan untuk renungan bersama:

Pertama: Sambutlah hari raya dengan sederhana serta jangan berlebihan, apatah lagi dicemari dengan perkara yang sia-sia atau maksiat.

Kedua: Hiasilah hari bertuah ini dengan adab-adab serta amalan-amalan sunnah yang telah diajar oleh Baginda Rasulullah ﷺ.

Ketiga: Zakat fitrah jangan lupa ditunaikan serta huluskan bantuan kepada yang kurang mampu agar turut gembira di hari raya.

Firman Allah dalam surah *Asy-Syarh* ayat 7 hingga 8:

فَإِذَا فَرَغْتَ فَانصَبْ ۖ وَإِلَىٰ رَبِّكَ فَارْغَبْ ﴿٨﴾

Maksudnya: “Kemudian apabila engkau telah selesai (daripada sesuatu amal soleh), maka bersungguh-sungguhlah engkau berusaha (mengerjakan amal soleh yang lain), dan kepada Tuhanmu sahaja hendaklah engkau memohon (apa yang engkau gemar dan ingin).”

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهِدْيِ سَيِّدِ الْمُرْسَلِينَ، أَقُولُ
مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ، فَاسْتَغْفِرُوهُ،
إِنَّهُ هُوَ الْغَفُورُ الرَّحِيمُ.





Khutbah Kedua Bulan April

2023M/ 1444H

الْحَمْدُ لِلَّهِ عَلَى آلائِهِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِحُشْنِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِنَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ، ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرٍ بَدَأَ فِيهِ بِنَفْسِهِ؛ فَقَالَ عَلِيمًا
حَكِيمًا:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا

﴿الأحزاب: 56﴾

اللَّهُمَّ صَلِّ وَسَلِّمْ عَلَى عَبْدِكَ وَرَسُولِكَ مُحَمَّدٍ نِ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ
إِلَى يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

Dalam kesempatan ini, mimbar ingin menyeru agar sama-sama kita menjadikan keselamatan diri, keluarga dan pengguna jalan raya yang lain sebagai keutamaan di sepanjang musim perayaan terutamanya pada perayaan Aidilfitri.

Muslimin dan muslimat juga diingatkan agar tidak melakukan tujuh kesalahan utama lalu lintas iaitu memotong barisan, memotong di garisan berkembar, tidak mematuhi isyarat lampu merah,



memandu melebihi had laju, menggunakan telefon bimbit semasa memandu, tidak memakai tali pinggang atau topi keledar dan memandu di lorong kecemasan.

Allah سُبْحَانَهُ وَتَعَالَى melarang para hamba-Nya yang beriman daripada melakukan apa sahaja perbuatan yang boleh membinasakan diri sendiri, sepertimana Allah berfirman dalam Surah Al-Baqarah, ayat 195 yang bermaksud:

"Dan janganlah kamu sengaja mencampakkan diri kamu ke dalam bahaya kebinasaan; dan baikilah (dengan sebaik-baiknya segala usaha dan) perbuatan kamu; kerana sesungguhnya Allah mengasihi orang-orang yang berusaha memperbaiki amalannya."

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ،

اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أَيْمَتَنَا وَعُلَمَاءَنَا وَوُزَرَائِنَا وَوَلَاةَ أُمُورِنَا.
اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibni Almarhum Sultan Haji Ahmad Shah Al-Musta'in Billah dan Kebawah Duli Yang Maha Mulia Seri Paduka Baginda Raja Permaisuri Agong, Tunku Azizah Aminah Maimunah Iskandariah Binti Almarhum Al-Mutawakkil Alallah Sultan Iskandar Al-Haj;

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.



اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرَّبَا وَالزُّنَا وَالزَّلَازِلَ وَالْمِحْنَ وَسُوءَ
الْفِتَنِ مَا ظَهَرَ مِنْهَا وَمَا بَطَنَ عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ
عَامَّةً يَا رَبَّ الْعَالَمِينَ.
اللَّهُمَّ إِنَّا نَعُوذُ بِكَ مِنَ الْبَرَصِ وَالْجُنُونِ وَالْجُدَامِ وَمِنْ سَيِّئِ الْأَسْقَامِ، يَا أَرْحَمَ
الرَّاحِمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP). Semoga sumbangan 10% daripada hasil kutipan Tabung Jumaat mingguan dari setiap masjid kepada Tabung Wakaf yang telah ditubuhkan, menjadi saham yang berkekalan manfaatnya, di dunia dan akhirat.

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايَ ذِي الْقُرْبَى وَيَنْهَى عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١﴾ فَادْكُرُوا اللَّهَ الْجَلِيلَ يَذْكُرْكُمْ،
وَاشْكُرُوهُ عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿٢٥﴾

